



N°696  
Entrée le 07.05.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 07.05.2024

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 07/05/2024

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.**

Et ginn ëmmer méi Educateuren an Educatrices hei am Land gesicht, grad an der Betreuung vun Kanner besteet hei am Land eng grouss Demande. Zousätzlech Esou soll an Zukunft am Cycle 1 zousätzlech zum Enseignant en Educateur oder eng Educatrice an all Klass sinn. An och an de Betreuungsstrukturen soll méi Personal agestallt ginn.

De 6te Mee huet den Educatiounsministère iwwert ee Communiqué matgedeelt, dass d'Kapazitéite fir d'Educateurs-Formatioun eropgesat solle ginn. Dëst iwwert 3 Weeër:

1. Kuerz a mëttelfristeg sollen d'Kapazitéite fir d'Educateurs-Formatioun am *Lycée technique pour professions éducatives et sociales* (LTPES) zu Miersch ausgebaut ginn;
2. Vun der Rentrée 2024/2025 u gëtt d'Educateurs-Formatioun am Enseignement secondaire général (Sektioon GED) och am Lycée Bel-Val am Süde vum Land ugebueden;
3. D'*École nationale pour adultes* (ENAD), déi schonn déi beruufsbegleedend Educateurs-Formatioun an der Haaptstad ubitt, soll dës Formatioun um Site vun Esch-Belval ubidden.

Op dësem Wee soll dem groussen Bedarf un Educateuren an Educatrices hei am Land Rechnung gedroe ginn.

An deem Zesammenhang wëllt ech dem Minister dës Froe stellen:

1. Wéi vill zousätzlech Enseignantë mussen agestallt ginn, fir all dës Klasse kënnen ze assuréieren a mussen dofir Enseignantë vun anere Klassen ofgezu gi respektiv Klassen zesummegeluecht ginn?
2. Wéi vill vun dëser Poste si scho fest besat? Wéi vill vun dëser Poste wäerte jeeweils duerch fonctionnariséiert Enseignantent a wéi vill duerch Chargés de cours assuréiert ginn?
3. "D'Opname-Kapazitéite fir d'Educateurs-Formatioun an der ENAD ginn och vun der Rentrée 2024/2025 un ausgebaut mat der Offer vun der beruufsbegleedender Educateurs-Formatioun op Däitsch um Site vu Belval. Vun der Rentrée 2025/2026 u bitt d'ENAD dës Formatioun och op Franséisch um Belval un."



[www.piraten.lu](http://www.piraten.lu)

Ëm wéi vill Plazen handelt et sech jeeeweils bei der Formatioun op Däitsch an op Franséisch?

4. *"D'Opname-Kapazitéite vum LTPES wäerten och kuerz- a méttelfristeg verstärkt ginn. Momentan gétt gepréift, wou déi zousätzlech Klassen installéiert kënne ginn."*

Kann de Minister hei scho soen, bis wéini dës Analyse sollen ofgeschloss sinn?

5. *"Den LBV start bei der Rentrée mat zwou 2e-GED-Klassen, déi ronn 50 Schüler kënnen ophuelen. D'Formatioun gétt op Däitsch ugebueden a fënnt am Bâtiment Terres-Rouges statt, am Häerz vu Belval. [...] Vun der Rentrée 2025/2026 u bitt de Lycée Bel-Val och d'Educateurs-Formatioun op Franséisch un."*

Firwat gétt d'Formatioun op Franséisch réischt ab der Rentrée 2025/2026 ugebueden a mat 2 Klassen op Däitsch ugefaangen?

Mat déiwem Respekt,



POLIDORI Ben  
Deputéierten





**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 696 vum honorabelen Deputéierte Ben Polidori**

**Ad 1)**

Am Lycée Bel-Val gi fir Rentrée 2024-2025 zwou nei Klasse fir d'Educateursausbildung ugebueden. Fir dës kënnen ze assuréieren, mussen esouwuel zwee nei Enseignantë recrutéiert ginn, wéi och Enseignanten aus anere Klassen agesat ginn, zum Beispill Enseignanten, déi Coursen op der Sektioun vun de Sciences sociales (GSO) assuréieren. Insgesamt kommen am Lycée Bel-Val fënnef Enseignanten dobäi, fir d'Gesamtoffer vun der Schoul déi nächst Rentrée ze assuréieren.

An der École nationale pour adultes (ENAD) muss een d'Admissiounen ofwaarden, fir kënnen d'Ressourcen ze affektéieren.

Am Lycée technique pour professions éducatives et sociales (LTPES) leeft d'Etude iwwer den Ausbau vun de Capacitéiten nach, soudatt een zu dësem Moment nach net ka soen, wéi vill Enseignanten zousätzlech gebraucht ginn.

Ganz allgemeng ass net virgesinn, datt duerch den Ausbau vun der Erzéierausbildung Klasse sollen zesummegeleucht ginn.

**Ad 2)**

De Recrutementsprozess grad ewéi d'Affektatiounen an d'Mutatiounen an den Lycéeë sinn nach net ofgeschloss, soudatt zu dësem Moment dës Fro net ka beäntwert ginn.

**Ad 3)**

Et wäert ee mindestens eng Klass op Franséisch wëllen ubidden, allerdéngs muss een hei d'Demande ofwaarden. Vu datt dat eréischt fir d'Rentrée 2025 virgesinn ass, kann ee réischt am Fréijoer 2025 méi kloer affichéieren, wéi grouss d'Demande och ass. An der ENAD ginn d'Admissiounen op Demande gemaach, soudatt een och hei muss ofwaarden, wéi grouss den Interessi ass. Um Site vu Belval sinn déi raimlech Capacitéite virgesinn, fir all Demanden unzehuelen.

**Ad 4)**

Et kann een dovunner ausgoen, datt d'Etudë bis de Summer ofgeschloss sinn. Zu deem Moment weess een, wéi déi Gesamtcapacitéit vum Site zu Miersch wäert evoluéieren. Op dësem Site sinn jo souwuel den LTPES, wéi och den Lycée Ermesinde.

**Ad 5)**

De Besoin un Erzéier ass permanent héich, soudatt et wichteg ass, d'Capacitéite kuerzfristeg ze erhéijen. Dofir gëtt elo d'Offer op Däitsch am Lycée Bel-Val ausgebaut. Vu datt et awer Schüler ginn, déi sech besser an enger franséischer Offer zurechtfannen, ass et virgesinn, esou eng Offer ab der Rentrée 2025 unzebidden. Déi kompetent Servicier a Kommissiounen schaffen elo un den noutwendegen Adaptatiounen vun de Programmer.

Lëtzebuerg, den 11. Juni 2024

De Minister fir Educatioun,  
Kanner a Jugend

(s.) Claude MEISCH